

Nunatta kangianut tulluarsakkamik ilinniarfimmik, Tasiilami inissinneqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngisitaartumik ilinniarfiullunilu piginnaasaqalerfiunissaa tunngavigineqassaaq. Siunnersuut UPA2027-mi saqqummiunneqassaaq.

Inatsisartunut ilaasortamit Nivi Rosing, Inuit Ataqatigiinneersumit saqqummiunneqartoq

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimssen, Inuit Ataqatigiit, siulittaasoq

Inatsisartunut ilaasortaq Isak Johannessen, Naleraq, siulittaasup tullia

Inatsisartunut ilaasortaq Margrethe Thårup Andersen, Demokratiit

Inatsisartunut ilaasortaq Karen-Marie Kyed Frederiksen, Demokratiit

Inatsisartunut ilaasortaq Nivi Rosing, Inuit Ataqatigiit

UPA2026-mi ulloq 21. maj 2026 siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Naalakkersuisut UPA2027-mi saqqummiunneqartussamik Tasilaami ilinniarfimmik pilersitsinissamik siunnersuummik saqqummiussissasut siunnersuummi siunertarineqarpoq. Ilinniarfik toqqammavilersorluagaassasoq, ilinniartitaanerit sammivissaat assigiinngitsut neqeroorutaassasut aammalu piginnaasanik annertusaalluni sullissivittut atorpeqarsinnaassasoq siunnersuutigineqarpoq.

Siunnersuutip Inatsisartunit siullermeerneqarnera

Siullermeerinninnermi Nunatta kangiani ilinniartitaanikkut atugassarititaasut pillugit annertuumik oqallittoqarpoq, ilaatigut ingammik nunap immikkoortortaata nukittorsarneqarnissaanik inerisaqqinneqarnissaanillu pisariaqartitsisoqarnera

eqqartorneqarluni. Ilutigisaanillu siunnersuutaqqaartup Naalakkersuisullu allannguutissatut siunnersuutaata akornanni assigiinngissutaasut eqqartorneqarput, tassani aamma isornartorsiorneqarluni Naalakkersuisut nalunaarummik suliaqartoqarnissaa siunnersuutigisimagaat ilinniartissamik pilersitsinissaq toqqarnagu.

Tamatuma saniatigut eqqartorneqartut ilagaat aningaasaateqarfinniit aningaasaliisoqarnissaanut periarfissat nalunaarummut ilaatinneqartariaqannginnersut.

Siunnersuutip siullermeerneqarnerani Naalakkersuisut ima allannguutissatut siunnersuummik saqqummiussipput:

”Tasiilami ilinniartissamik pilersitsinissaanissamut pisariaqartitsineq pillugu nalunaarusiamik UPA2027-mi saqqummiunneqartussamik Naalakkersuisut suliaqarnissamut Inatsisartut aalajangiiffigisassaattut siunnersuut”.

Inuit Ataqtigiit aamma Siumut siunnersuummut isumaqataapput. Demokraatit aamma Atassut Naalakkersuisut allannguutissatut siunnersuutaannut isumaqataapput. Tamatuma kinguneratigut siunnersuut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqarpoq.

Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1, allaqqavoq siunnersuut tunngavilersugaassasoq siunnersuutillu aningaasatigut allaffissornikkullu kingunerisinnaasai allaaserineqarsimassasut. Siunnersuut A/C fuldmægtigip ukiup ataatsip ingerlanerani sulinissaa 500.000. kr-inik naleqassasoq naatsorsuutigineqartoq siunnersuuteqartup allassimagaa ataatsimiititaliamit maluginiarneqarpoq, sanaartornermut aningaasartuutit il. il. pinnagit.

Ataatsimiititaliap siunnersuummut oqaaseqaatai

Tasiilami ilinniartissamik pilersitsisoqarnissaanut siunnersuusiortoqartinnagu aalajangernissamut sukumiisumik tunngavissaqartariaqartoq Naalakkersuisut nalilersimagaat ataatsimiititaliamit maluginiarneqarpoq.

Ilinniartitaaneq pillugu politikikkut aalajangiisarnerit nunatta ilinniartitaanikkut aaqqissuussaananeranut ataqtigiissumik pisariaqartitanillu naapertuisumik suliaqarniarnermi ilisimatuussutsikkut tunngavilersuutit malillugit suliarineqartarnissaat ataatsimiititaliap UPA2026/75 aamma UPA2026/61 suliarinninneranut atatillugu oqaatigineqarnikuuvoq. Ilinniartitaanermi piginnaasatigut ineriartortitsineq aamma illussanik aningaasaliisarnerit, nuna tamakkerlugu piginnaasanik pisariaqartitsinernik takutitsisumik, pitsaassutsimut annertussutsimullu pisariaqartitanik misissuinerit tunngavigalugit aamma suliarineqartassapput.

Siullertut pisariaqassaaq pisariaqartitat pillugit nuna tamakkerlugu misissueqqissaarnissamik suliaqarnissaaq aqputigalugu nunatsinni piginnaasatigut ilinniarsimassutsikkullu pisariaqartitat qulaajaavigineqarnissaat, nunaqarfiit illoqarfiillu ataasiakkaat ilanngullugit. Taamatut misissueqqissaarneq misissuinernik assigiinngitsunik malitseqartinneqartassaaq, taakku ilaatigut nunap immikkoortuini sumiiffinnilu pissutsinik, suliffeqarfinni massakut siunissamilu pisariaqartinneqartunik, inuiaqatigiit aaqqissuussaanerisa qanoq ineriartornerinik, ilinniarnermut neqeroorutinut pioreersunut kiisalu sumiiffimmi piginnaasanik annertusaanissamut periarfissanik allanillu ersersitsisuussallutik.

Taakkua tunngavigalugit ilinniarnermut neqeroorutaasut piumaneqartullu siunissami naleqquttunngorsarneqarsinnaalissagaluarput kiisalu ilinniartitaanikkut aaqqissuussinermi ataqatigiinnerusumi pisariaqartitallu malillugit suliaasumi anguniakkanik pingaarnersiuisoqarluni, naleqqussaasoqarluni aningaasaliisoqarlunilu suliaqartoqarsinnaalissaaq.

Taamaattumik ataatsimiititaliamit pitsaasut nalilerneqarpoq Tasiilami ilinniarfimmik pilersitsisoqarnissaanut aalajangertoqartinnagu pisariaqartitat pillugit misissuisoqarnissaa Naalackersuisunit pisariaqartutut isigineqartoq.

Peqatigisaanik ataatsimiititaliamit nalilerneqarpoq pisariaqartoq piffissaasorlu nuna tamakkerlugu pisariaqartitat pillugit misissueqqissaarnermik aallartitsisoqarnissaa, tassani siunertarineqarluni ilinniakkat sorliit illoqarfinni nunaqarfinnilu suliffeqarfinnit piumaneqarnerunersut paasinianeqarnissaa, taamaalilluni ilinniartitaanermut immikkoortortap iluani pingaarnersiuiunerit, naleqqussaanerit aningaasaliinerillu ingerlanneqarsinnaassallutik.

Ataatsimiititaliap inassuteqaatai

- Ataatsimiititaliami amerlanerussutillit, Demokraatineersut aamma Inuit Ataqtigiinneersut, allannguutissatut siunnersuut tulliuuttoq akuerineqartussanngorlugu inassutigaa:

”Tasiilami ilinniarfimmik pilersitsinissamut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngitsunik ilinniarfiullunilu ilinniartitaanikkut sammivinnik assigiinngitsunik neqerooruteqassaaq kiisalu piginnaasanik ineriartortitsinermut qitiusoqarfittut atuutissalluni. Siunnersuut Tasiilami ilinniartitaanikkut neqeroorummik ineriartortitsineq pillugu nalunaarusiamik pisariaqartitsinerup misissuiffigeqqissaarneqarneranik imaqtumik tunngaveqartinneqassaaq, aningaasaateqarfinit aningaasalersuisoqarsinnaaneranut periusissamik imaqarluni aammalu UKA2027-mi saqqummiunneqassalluni”.

Nunaqarfinni illoqarfinnilu suliffeqarnermi piginnaasatigut pisariaqartitsinerit paasineqarsinnaaqullugit nuna tamakkerlugu pisariaqartitsineq pillugu misissueqqissaarnerup ingerlanneqarnissaata sulissutigineqarnissaanik Naalakkersuisut ataatsimiititaliami amerlanerussutilinnit, Demokraatineersunit aamma Inuit Ataqtigiinneersunit, kaammattuiffigineqarput.

Ataatsimiititaliap taama oqaaseqaateqarluni isumaliutissiissummilu allassimasutut paasinnilluni siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Karen-Marie Kyed
Frederiksen

Nivi Rosing